

**Apeqquteqaat aallaavigalugu oqallittoqarnissaanut siunnersuut:  
Ingerlatseqatigiiffissuit Namminersorlutik oqartussanit pigineqartut siunissami  
inuiaqatigiinni qanoq iliuusissatigullu pilersaarutini qanoq inissisimatinneqassappat?**  
(Inatsisartuni ilaasortaq, Karl-Kristian Kruse, Siumut)

**Akissuteqaat**

(Naalakkersuisut Siulittaasuat)

Aallaqqasiullugu Naalakkersuisut Karl-Kristian Krusep, Siumumeersup  
Ingerlatseqatigiiffissuit Namminersorlutik oqartussanit pigineqartut siunissami inuiaqatigiinni  
qanoq iliuusissatigullu pilersaarutini qanoq inissisimatinneqassanerat pillugu apeqquteqaat  
aallaavigalugu oqallinnissamut siunnersuutaanut qujapput. Sammisq tamanna pillugu  
apeqquteqaat aallaavigalugu oqallinnissaq pissutsinik ingerlatseqatigiiffinni namminersorlutik  
oqartussanit pigineqartuni ineriartornermi atorneqartunik paasiniaasoqarnissaanik  
periarfissiivoq.

Naalakkersuisut ilisimatitsissutigisinnaavaat, ingerlatseqatigiiffiup ineriartornissaa pillugu  
ingerlatseqatigiiffiit aqutsisui suleqatigalugit ingerlaavartumik oqaloqatigiinnerit  
ingerlanneqartarmata, kiisalu ingerlatseqatigiiffiit ataasiakkaat aaqqissuunneqarnissaminnut  
naleqquttuunersut aamma piareersimanersut. Naliliinerit taakku aningaasaqarnikkut  
inuiaqatigiinnullu tunngasutigut aallaaveqartinneqarput, pissutsillu taakku  
pingaaruteqarnerpaat ilagaat, piginneqatigiiffimmik ingerlatsinermi malunnaatilimmik  
allannguisoqassatillugu nalilersuinermi tunngaviusariaqartut.

Ataatsumut isigalugu siunnersuuteqartumut Naalakkersuisut isumaqataapput, tassa  
ingerlatseqatigiiffinnik suliffeqarfinnillu piginnittuunerput suli ineriartortinneqassasoq aamma  
ingerlatseqatigiiffiit aningaasanik iluanaarniarneq kisiat siunertarinagu aamma allanik  
siunertaqartinneqassasut. Ingerlatseqatigiiffitta siunertarivaat kalaallini inuiaqatigiinni  
tunisassiorneq tapersersussallugu aamma nunami innuttaasunut tulluartumik  
kiffartuussinissaq qulakkiissallugu. Ingerlatseqatigiiffiit namminersorlutik oqartussanit  
pigineqartut tamarmiullutik siunertaqarput - inuiaqatigiinni sularineqartariaqartunik  
aaqqiivigisassaqarput.

Taamaattoq ingerlatseqatigiiffiutitta ineriartornerat siunissaallu eqqartorneqartillugit  
ingerlatseqatigiiffiit assigiinnginnerujussuat maluginiassallugu pingaaruteqarpoq,  
ingerlatseqatigiiffiillu ineriartornissaannut naalakkersuinikkut anguniakkat aamma  
assigiinngitsorujussuummata.

Assersuutigalugu soorlu Royal Arctic Line A/S, Kalaallit Airports A/S, Tele Greenland A/S, KNI A/S, Sikuki Nuuk Harbour A/S aamma Air Greenland A/S attaveqaatitigut pilersuinikkullu suliffeqarfipput. Ingerlatseqatigiiffit taakku ilaatigut ataatsimuussutigaat pilersuinermik kiffartuussinermillu ingerlataqartuugamik, taannalu aqqutigalugu "nunarput tamakkerlugu" sullissisuummata ajunngitsumik assigiissumillu kiffartuussisuullutik.

Ingerlateqatigiiffittut ingerlatat allat assersuutigalugu tassaapput NunaOil A/S, Greenland Holding A/S, Greenland Oil Spill Response A/S aamma Visit Greenland A/S.

Ingerlatseqatigiiffit taakku mikisuupput aamma niuernerup tungaatigut ingerlatsinermik nalinginnaasumik isumaginnituunatik. Ingerlatseqatigiiffinni taakkunani ingerlatseqatigiiffinnik ingerlatseriaaseq toqqarneqarsimavoq ilaatigut aalajangeeriaatsinik naalakkersuinikkut allaffissornikkullu attuumassuteqanngitsumik atuilluni ingerlatsisoqarnissaa qulakkeerniarlugu.

Ingerlatseqatigiiffittut allatut ingerlatat pingajoraat Royal Greenland, taannalu niuerfinni unammillerfiusuni tamakkiisumik iluanaarfiusussatut ingerlanneqarpoq.

Allatut oqaatigalugu ingerlatseqatigiiffit kalaallini inuiaqatigiinni assigiinngitsunik naammassinnittarput. Eqqumaffiginiassallugu pingaaruteqarpoq. Ilaat niuernermik ammasumik aamma unammilleqatigiiffiusumik ingerlatsippu, allat inatsisit imaluunniit akuersissutit aqqutigalugit nalinginnaasumik unammilleqatigiinnerup avataani inuiaqatigiinni suliassanik naammassisassanik isumaginnittarput.

Taamaattumik pisariaqarpoq, ingerlatseqatigiiffit ataasiakkaat tunngavigisaat aallaavigalugit niuernermik eqqortumik aaqqissuussinissaq. Ingerlatseqatigiiffiup suna inissisimaffigaa? Ingerlatseqatigiiffik sutigut naammassinnittassava? Suut iluaqutaasinnaappat, ajoqutaasinnaappat sunniiveqatigiissinnaappalluunniit ingerlatseqatigiiffiit Namminersorlutik Oqartussanit pigineqartut aaqqissuussaanerisa allanngortinneqarnerisigut?

Naalakkersuisut isumaqarput, piginneqatigiiffitsinnut aalajangersimasunik anguniagassanik tunngavissanillu peqartuarsimasoq, tamakkulu atuussimapput ingerlatseqatigiiffit ataasiakkaat pilersinneraniilli, tamakkulum aamma Inatsisartuni Naalakkersuisunilu naalakkersuinikkut isumaqataaffigineqarluarsimapput. Assersuutigalugu ukiut ingerlaneranni tunngaviatigut aalajangiussimaneqartuarpoq ingerlatseqatigiiffit naalakkersuinikkut allaffissornermi aningaasaqarnermut aqutsisoqarnermullu attuumassuteqarnatik ingerlanneqassasut aamma ingerlatseqatigiiffiit naalakkersuinikkullu allaffissornermi aqutsisut akornanni aningaasaqarnikkut ammasumik ingerlatsisoqarnissaanik ingerlatseqatigiiffiillu attuumassuteqartut niuernerannut illorsorneqarsinnaasumik ingerlatsisoqarnissaanik tunngaviiit attatiinnarneqarlutiik.

Tamaat isigalugu nalornisigineqassanngilaq ingerlatseqatigiiffinni assigiinngitsuni sammineqartut niuernikkut illorsorneqarsinnaasumik tunngaveqarluni ingerlanneqassammata,

tamatumanilu ingerlatseqatigiiffiit ineriertortuarnissaat aamma pingaaruteqarmat, tamannalu inuiaqatigiinnut iluaqutaalluni. Naalakkersuisut erseqqissaatigerusuppaat, ingerlatseqatigiiffissuit Namminersorlutik Oqartussanit pigineqartut allatut aaqqissuunneqarnissaat suliassaasoq annertooq aamma suliassaavoq inuiaqatigiinnut akuersaarneqarsinnaasumik akuersaarneqarsinnaanngitsumilluunniit kinguneqarsinnaasoq.

Naalakkersuisuniit taamatut oqaaseqluta Inatsisartut oqallinnissaat qilanaaraarput.